

Der Erst Artickel.



WIR Georg von Gots
gnaden Hertzog zu Sachsen
Landtgraff in Düringen vnd
Marggraff zu Meissen / Thun
kuntt aller menniglich / So als
der almechtig Gott on zweyffel/
aus sonderlicher gnad / zumehrung seines ewigen lo-
bes / vnd viel menschen zubesserung / in Kurtzuorgang-
ner zeit / ein New Bergkwerck / auff vnd vmb Sanct
Annaberg vorliehen / vn̄ mit merglichem nutz erenget
hat / dorans höfflich ist / wue solchs mit guther Regi-
rung vorsehen / vnd vleissig bestalt wirdt / noch hinfür
der Gots gnad mehr erscheinen / vn̄ viel guthes dor-
aus erfolgen werde / welichs Wir vns / als Fürst der
Landt / dorinnen bemeldt Bergkwerck gelegen / vnd
begriffen ist / nach vnserm vormögen zufürdern schul-
dig erkennen. Vnd ap wir wol zuuor auff gemeltem vn-
serm Bergkwerck mancherley ordnung / zu nutz vnd
notturfft gemeines Bergkwercks / gestelt / So ist es
doch mit rechter ordnung / nicht zusame bracht / auch
noch mancherley zuuororden notturfftig befunden.
Dorumb Wir mit guther betrachtung vnd zeittigem
rath / vorige vnser Ordnung / mit zimlicher vnd nutz-
licher vorbesserung / in andern form haben stellen / die
inn Druck bringen lassen / auff das iderman / dem es
not oder nutz werden mag / solcher vnser ordnung vn-
terricht bekommen / vnd sich allenthalben dornach rich-
ten möge. Auch sich niemants in mißbrauch dersel-
ben / der vnwissenheit zuentschuldigen habe.

Der